

Eugene Kingsale ta bolbe bati bon y un biaha mas ta serca di subi pa .300

SAN DIEGO- Cosnan ta sigui bai bon pa Eugene Kingsale, kende practicamente a bira e rightfielder regular di San Diego Padres y pa gran parti ta debi na su bateo, cu atrobe ta laba laba serca di .300 despues di e wegá di Diaranzon anochi contra Arizona Diamondbacks.

Den wegá c' un biaha mas San Diego ta perde pa motibo di pitcheo, e hungador Arubiano ta bai di 3-2 den cuatero turno na plato, caminda el a ricibi un boleto, empuha un careda y a laga un coredor riba base.

Cu e dos hitnan den e wegá aki, Eugene a logra di subi su averahe di bateo te na .297, solamente tres décima di e magico number di .300 mientras cu e ta di tres regular cu e mihor averahe di bateo y ta number dos entra esnan cu tin mihor porcentahe di subi base pa Padres. Solamente Ryan Klesko, e superestrella di e ekipo tin un porcentahe di .393 mientras cu Kingsale hunto cu Mark Kotsay tin un porcentahe igual di .362.

Cifranan impresionante sin duda algun y di e forma aki Kingsale ta sigurando un contrato nobo pa proximo temporada cu San Diego Padres. E ultimo diez wegáan di campeonato ta di vital importancia pa Kingsale y si e logra di termina e temporada cu averahe di riba .300, ta casi sigur cu e lo ricibi un oferta nobo di Padres, mirando cu manager Bruce Bochy ta sumamente encanta cu su wegá, tanto bateo, fildeo como determinacion.

Diaranzon contra Arizona, Kingsale ta bin promer bes na plato den di dos entrada contra e pitcher Helling y ta conecta di hit pa leftfield pero despues ta ser elimina na segunda, ora cu Deivi Cruz conecta rolling pa double play pa pitcher.

Arizona ta rally grandi pa cinco careda den di cuater entrada pa tuma ventaha di 6-0 y den bom di cuater inning, Phil Nevin ta habri cu hit y Ron Gant ta haci mesun cos, mientras cu Kingsale ta ricibi boleto pa yena e basenan y tur cos tabata muestra cu Padres lo rally den e entrada aki. E 17.288 fanaticonan a lanta para pa nan anima nan ekipo pero un biaha mas Deivi Cruz ta conecta rolling pa double play pa mata e inning, eliminando Kingsale na segunda base mientras cu Nevin a score pa pone e wegá 6-1.

Den di sexto entrada Padres ta bolbe reacciona cu e score 8-1 ora cu Nevin bati di hit pa rightfield y Gant sigui cu hit pa mesun rumbo. Eugene Kingsale e ora ta conecta doblete pa leftcenter pa empuha Nevin pero Gant no ta logra di anota pa motibo di su lentitud y ta keda coredor na tercera y segunda y un careda ta drenta despues riba un fielder choice.

Den di ocho entrada Kingsale ta bolbe bin bati y despues di a subi base na tres ocasion sigui, ta ser elimina cu rolling pa primera base y terminando asina su actuacion na plato.

Fuera di esaki Kingsale a bai hunga den leftfield den di shete entrada y den di ocho a bai den centerfield, demostrando asina e confianza cu manager Bochy tin den su fildeo.

Ayera nochí laat e ekipo di San Diego Padres a topa un biaha mas cu e ekipo di Arizona Diamondbacks caminda e superastro Curt Schilling lo ta riba monticulo pa Arizona, pues un bon reto pa Kingsale si e ser permiti pa habri contra un lanzador derecho.

